

Headlines

- जम्मू-कश्मीर च हाडें दे मद्देनजर राहत सहायता दे तौरा पर हरियाणा सरकारै 5 करोड़ रपे दिते न। मुख्मन्त्री उमर अब्दुल्ला होरें एदे लेई आभार जताया ऐ।
- केन्द्रीय मंत्री डाक्टर जितेन्द्र सिंह होरें भविक्ख दियें पीढियें लेई डोगरी भाषा गी इक जीन्दी-जागदी विरासत च तबदील करने दी जरूरतै पर जोर पाया ऐ।
- जंगलात मंत्री जावेद राणा होरें जम्मू च पर्यावरण सरबन्धी चुनौतियें दा जायजा लैता ते जंगलें दी राक्खी-हिफाजत लेई सख्त हीलें अमल च आनने लेई आक्खेया ऐ।
- शिक्षा मंत्री स्कीना इत्तू होरें जम्मू-कश्मीर च प्राईवेट युनिवर्सिटियें सरबन्धी नीति 2025 त्यार करने लेई तौर-तरीकें दी समीक्षा कीती ऐ।
- जम्मू च भारी बरखा करी जन-जीवन पर माडा असर पेया ऐ, मौसम विभाग नै अज्ज दपैहरी तोड़ी भारी बरखा दी पेशगोई कीती ऐ। जम्मू-श्रीनगर राष्ट्रीय जरनैली सिडकै पर गड्डियें दी आओ-जाई अज्ज बी बंद ऐ।



CM Haryana Aid

जम्मू-कश्मीर च आए दे हाडे दे मद्देनजर मुख्मन्त्री उमर अब्दुल्ला होरें मुख्मन्त्री राहत कोश च 5 करोड़ रपे दे योगदान लेई हरियाणा सरकार ते मुख्मन्त्री नायब सिंह सैनी हुन्दा आभार प्रकट कीता ऐ। मुख्मन्त्री होरें आक्खेया ऐ जे इस योगदान कन्नै हाड प्रभावित इलाकें च जारी राहत ते पुर्नवास दे कम्मे च मदद थ्होग। उनें एह बी भरोसा दोआया जे इस फंड दा इस्तेमाल प्रभावित परोआरें ते जरुरी ते क्षतिग्रस्त बुनियादी ढांचे गी ठीक करने लेई कीता जाग। मुख्मन्त्री उमर अब्दुल्ला होरें आक्खेया जे हरियाणा सरकार आसेया दस्सी गेदी एह जुटता, एकता ते करुणा दी भावना गी दर्शादी ऐ।



Jitendra Singh Dogri (Byte)

केन्द्रीय मंत्री डाक्टर जितेन्द्र सिंह होरें जम्मू युनिवर्सिटी दे ब्रिगेडियर राजेन्द्र सिंह आडिटोरियम च 10में कुंवर वियोगी मैमोरियल लैक्चर आले कार्यक्रमै च हिस्सा लैता। इस मौके अपने सम्बोधन च डाक्टर सिंह होरें डोगरी भाषा गी जम्मू-कश्मीर च सरकारी भाषा दा दर्जा थोहने ते इसी संविधान दी 8मीं सूचि च शामिल करने दे बावजूद डोगरी भाषा अगगे मौजूद चुनौतियें पर लौ पाई। उनें लोकें गी गुजारिश कीती जे ओ छड्डा नारे लाने कोला अगगे बददे होई, पूरे जोश ते शमूलियत आली भावना कन्नै डोगरी भाषा गी बढ़ावा देने दा कम्म करना। डाक्टर सिंह होरें आक्खेया जे डुग्गर दी विरासत गी आलमी सतह पर भारत दी तरक्की मुजब गै अगगे बढ़ाया जाना लोडचदा ऐ। केन्द्रीय मंत्री होरें भविक्ख दियें पीढियें लेई डोगरी भाषा गी इक जीन्दी-जागदी विरासत च तबदील करने दी जरूरतै पर जोर पाया। उनें आक्खेया.....(बाईट)



Rana Forests

जंगलात ते पर्यावरण मंत्री जावेद अहमद राणा होरें जम्मू च पर्यावरण आसेया आई दी चुनौतियें ते संरक्षण दे जतनें दा आकलन करने लेई लाई गेदी समीक्षा बैठक दी अध्यक्षता कीती। इस बैठक च जंगलें दा घट्टना, जैव-विविधता ते बधदे प्रदूषण जनेह मुद्दे पर चर्चा कीती गेई। मंत्री होरें जंगलें, जल स्रोतें दे कोल सख्त निगरानी ते CAMP ते ढलाने दा स्थिरीकरण, जनेही परियोजनाएं दी प्रगति दी बी समीक्षा कीती। उनें इको-सैलसफा ते युवाएं दी जागरुकता उप्पर जोर दिंदे होई, जम्मू डिविजन च असरदार ते टिकाऊ पर्यावरण संरक्षण लेई विभाग दे आपसी तालमेल गी बी मजबूत करने उप्पर जोर दिता।



Taxpayers Helpline

जम्मू-कश्मीर दे स्टेट टैक्स विभाग नै करदाताएं गी E-Way बिल कन्नै सरबन्धित मामलें च मदाद उपलब्ध करोआने लेई समर्पित हैल्प नम्बर जारी कीते न। ए हैल्पलाईनां बिल त्यार करने च औने आलियें त्रुटियें, बवस्था च औने आलियें रुकावटें गी दूर करने दे कन्नो-कन्नो औपचारिकतां पूरी करने च बी मदद करगंन। पेशेवर माहिराना आसेया इनें हैल्पलाईनें दे राएं

सरकारी कम्मकाज आले समें दौरान करदाताएं दियें समस्याएं दे नबेड़े करोआए जागंन। जम्मू जिले दे करदाता एकड़े टैलिफोन नम्बरें पर सहायता हासल करी सकदे न। नम्बर इस चाली न- 94191-57257 ते 70069-63445. इस पैहलकदमी दा मकसद GST सरबंधी प्रणाली दे बवस्थित कम्मै-काजे गी यकीनी बनाना ते करदाताएं दियें समस्याएं दा बेल्लै सिर नबेड़ा करोआना ऐ।



PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।



Itoo Private Univ.

शिक्षा मंत्री स्कीना इतू होरें जम्मू-कश्मीर निजी विश्वविद्यालय नीति-2025 दी समीक्षा लेई इक उच्च स्तरीय बैठक दी अध्यक्षता कीती। इस नीति दा मकसद उच्च शिक्षा दे मौकें गी बढ़ावा देना ते कन्नै गै गुणवत्ता ते पारदर्शिता गी यकीनी बनाना ऐ। मंत्री होरें प्रतिष्ठित निजी युनिवर्सिटियें लेई सक्षम माहौल बनाने, शैक्षणिक ते मजबूत नियमन सुरक्षा गी बनाई रक्खने उप्पर जोर दिता। उमें इसी खीरी रूप देने लेई व्यापक हितधारकें कन्नै गल्लबात ते अंतर विभागीय तालमेल दा बी आहवान कीता। इस नीति कन्नै जम्मू-कश्मीर गी औने आहले बरे च नवाचार, ज्ञान ते हुनर विकास आस्तै केन्द्र ते तौरा उप्पर स्थापित करने दी परिकल्पना कीती गेई ऐ।



Aadi Karmyogi Poonch (Byte)

सार्वजनिक सेवाएं दी दस्तेयाबी दी दिशा च इक बड्डी गैं पुट्टे होई पुंछ दे डिप्टी कमीशनर अशोक कुमार शर्मा होरें आदि-कर्मयोगी अभियान दे तैहत जिले च त्रंऊ दिनें दी इक विशेष कार्यशाला दा कल उदघाटन कीता। इस कार्यशाला दा मकसद सरकारी कम्मै-काजें च पारदर्शिता ते जवाबदेही बदाने आस्तै मलाजमें दा समर्थ निर्माण करना ऐ। इस दौरान प्रतिभागियें गी डिजिटल तौर-तरीकें, नियमें-कायदें ते सार्वजनिक शकैतें दे नबेड़े सनें ते होरनें बी बक्ख-बक्ख विशें बारे व्यापक जानकारीयें दितियां जागंन। कल इस कार्यशाला दे पैहले ध्याड़े नोडल अफसर खालिद हुसैन ते मास्टर ट्रेनरें सक्रिय भागीदारी गी बढ़ावा देने सरबंधी विशें पर अपने विचार सांझे कीते। डिप्टी कमीशनर होरें ए मेद बुज्जी ऐ जे सिखलाई आले इस कार्यक्रम दे राएं सरकारी कम्मकाज होर बी बेहतर बनोग ते आम बसनीकें ते सरकार बश्कार सरबंध बी तगड़े बनगंन। आकाशवाणी समाचार कन्नै इस बारे चेचे तौर पर गल्ल करदे होई नोडल अफसर खालिद हुसैन होरें आक्खेया.....(बाईट)



Weather

जम्मू दे बक्ख-बक्ख हिस्सें च जंदे रोज थमां लगातार बरा करदी भारी बरखा दे चलदे केई इलाकें च पानी भरोचने-ट्रैफिक जाम लगने ते औने-जाने आलें गी परेशानियां पेश औने दियां खबरां हासल होआ करदियां न। जम्मू खित्ते दे सब्भै बड्डे दरेया जियां चनां- तवि-रावी ते उज्ज खतरे दे निशान कोला उप्पर बगा करदे न। मौसम विभाग नै जम्मू-कठुआ-रियासी-उधमपुर-डोडा-राजौरी ते रामबन जिले च अगले 4 शा 6 घंटे दौरान भारी थमां बड्डी भारी बरखा दे आसार जताए न। मौसम विभाग नै पीर-पंजाल दे बी केई इलाकें च दर्मेयाने दर्जे थमां भारी बरखा बरने दी पेशगोई कीती ऐ। लोकें गी सलाह दिती

गेई ऐ जे ओ सौहगे सतर्क रौहन ते गैर जरुरी यात्राएं गी टाली देन ते एहतियाती हीलें दे तौरा पर मुकामी प्रशासन आसेया जारी दिशा-निर्देशें दी पालमा करन।



Traffic (बाईट)

तोंआई जम्मू-श्रीनगर राष्ट्रीय जरनैली सिडकै पर गड्डियें दी आओ-जाई अज्ज बी बंद ऐ। केंई सारी थाहरें पर जिमी धस्सने ते लास-पस्सियां पौने दे चलदे लोकें दी सुरक्षा गी दिक्खदे होई ए फैसला लैता गेदा ऐ। ध्यानजोग ऐ जे जम्मू-श्रीनगर जरनैली सिडकै गी 6 दिन बंद रौहने मगरा जंदे संगारे अद्दे-दुब्बे तौरा पर ब्हाल कीता गया हा। इस बारे पेश ऐ साहडे संवाददाता अचिन दूबे दी ए खास रिपोर्ट.....(बाईट)

तोंआई मौसम दे खराब सूरतेहाल दे मद्देनजर जम्मू-कश्मीर च अज्ज बी सब्भतें सरकारी ते निजी शिक्षा इदारें गी बंद रक्खेया गेदा ऐ। अज्ज लैते जाने तय होए दे सब्भनें म्तेहानें गी बी अगडा पाई दिता गया ऐ।



4th Bridge closed

जम्मू च लगातार बरा रदी भारी बरखा दे मद्देनजर जम्मू दे डिविजनल कमीशनर रमेश कुमार होरें तवी नदी पर बनाए गेदे चौथे पुल ते एदे कन्नै लगदी सिडक गी बंद करने दा हुकम जारी कीता ऐ। लोकें गी सलाह दिती गेई ऐ जे ओ होटल एशिया-सतवारी चौक ते भगवती नगर आली बक्खी दा मेजर सोमनाथ चौक ते चौथे पुलै बक्खी सफर नेंई करन। एदे इलावा लास-पस्सियां ते कुप्पड पौने करी पंजतीर्थी च अटल चौक थवां सिद्दा पुल तोड़ी दी सिडक बी गड्डियें दी आओ-जाई लेई बंद ऐ। सरबंधित अधिकारियें आम लोकें गी गुजारिश कीती ऐ जे ओ जारी दिशा-निर्देशें दी पालमा करन ते अपनी सुरक्षा लेई गैर-जरुरी यात्रां फिलहाल टाली देन।